



05370

集

蘊

嘒

閣

別

道光五年乙酉

秋九月開雕



蘊懷閣別集自序

駢散之文古無定體謂散體尊駢體卑駢體易散體難者
下士之讐言也蹈庸熟習浮夸俳優風斯下矣若欲
追漢京之風規馳建安之氣質則必託興高遠游心元穆
澄之欲其清積之欲其厚澀之欲其澹揚之欲其華縱之
欲其往操之欲其留駢乎散乎作者何所區分乎讀者何
所軒輊乎有唐之文莫盛于元和然韓集進學解盤谷序
諸作散而駢者也碑銘諸作鉤章棘句駢而散者也柳集
碑文規仿六代既深既博亦駢亦散世之論者謂韓柳薄
駢體不爲陋矣誣矣駢文至宋古義浸亡明三百年一蹶
不振我朝迎陵林蕙諸家各自矜奮踔厲風發覈之于

蘊懷閣別集自序

一

古去以千里自胡氏稚威振起衰弱竝世宏材從而和之
厥道斯昌歷選英華於茲爲盛夫惟天地之道一陰一陽
禮俗之變一文一質文章亦然斟酌事物權衡體勢錯綜
參伍行而宜之夫何駢散之與有余雖不足以與乎此而
自以爲猶能見之也余雖有以見乎此而惜乎其不能爲
之也敢誦其所聞質諸當世之治古文者鎮洋盛大士

蘊懷閣別集目錄

卷弟一

金華山芙蓉峯賦

遊赤松山賦

尖山觀潮賦

檀園賦

卷弟二

楚辭注釋參校序

泉幣儲珍序

溪山卧遊錄序

唐墅張氏宗譜序

蘊懷閣別集目錄

一

李曉潭竹湖山館古泉拓本序

練川七生圖序

黃香鐵江天永慕圖序

雪夜集大庾相國海淀園居序

翁覃溪學士蘇齋賞菊詩序

粵東七子詩序

陸萊臧詩集序

淮上唱酬詩序

棗花樓詩鈔序

徐秋士詩集序

蘭素女史繡餘吟課序

卷第三

與張椒卿書

與湖州趙季由太守書

答徐桓生書

貽虞山友人書

與譚韶九書

與畢文季瑜書

答蕭梅生書

與潘彥輔書

答黃霽青太守書

卷第四

蘊懷閣別集目錄

二

重修古三茅觀碑

巢棲碑銘

杭州兵備道署新築退思居記

澹然居記

石刻宋賢誥勅像贊跋

虞山唐墅志跋

郎芝田擬古畫冊跋

淞塘蟹舍畫冊跋

彭湘涵誄

胡母汪孺人誄

李安人誄

金華山芙蓉峯賦

別集一

浙東山水甲天下金華屬會稽西部梁武置郡靈園顯
八詠樓聳雙溪水清芙蓉一峯尤爲諸山之冠柔兆之歲
余過東陽攀崕涉澗浹旬斯返元契所託塵想頓息援筆
作賦以紀勝遊其辭曰

繁僊都之清邃廓靈境之幽遐閃金星之燦爛爭婺女之
光華城郭錯峙而縈帶林厓晻靄而鬢影靈溪沉澹以瀟
澗倚嶼磬確以崕呀鳥墮絕壁虹銜斷槎松拂石梁之瀑
蓮飄鼎湖之花爾其峻極之狀屹若屏障增岡重阻列阜
延曠赤松左倚智者右向剡曉峴之孤巒拱鬼嶷之疊嶂
十步五步倏俛倏仰大山小山若爭若讓梳雲髮塢之尖

靈樞閣別集卷第一

一

摘星恠石之上九朵空青變滅一手萬綠摩盪初晴之辰
霞晃朗其若飛欲雨之夕霧冥濛而不放三洞之勝地志
所傳北山之峯別開洞天有徐公湖水清且漣瀉乎山橋
經乎鹿田素練漾其澂潔文錦濯其麗鮮分兩派以傾注
羌若斷而復連十里而近兩崖之間有竹一坡有石一拳
循竹石以孤往忽異境之豁然萬叢夾岍兩石傑立如負
鼇背若垂鵬翼絕其萬丈而蒼莽孤煙一綫而峭直遠山
林密秋不霜而自紅陰厓溜寒天無雲而亦黑嘉蔭歲蕤
以菀茂異莠葳蕤以翕施絲筵筵抽節而鮮潤抽梧挺榦而
秀特青虬蜿蜒蟠其根翠羽啁啾繞其側藤蘿屈曲之形
莓蘚斑斕之色訝太古之奇字匪人間之可識則有潛岳

古寺山樵舊莊胡叟耕隱之庀王莖讀書之堂方疏圓井
層軒曲廊蠹岫喘之浮柱跨偃蹇之飛梁入幽邃之網戶
闢窅窅之硿房溯曩躅於既往緬風流之未央道士坐帳
而飼鶴仙人攜杖而叱羊胡麻之飯初熟石鼎之藥正香
拾瑤草兮誰贈折瓊枝以迴翔睇瑤臺之縹緲鏗八瓊之
琳琅恍置身于瓊樓之百尺而涌現乎蓮花十丈之金光
亂曰金華之山環窈窕兮芙蓉之峯削青杳兮碧城容容
巨天表兮煙局霧橫鬱繚繞兮登其崇岡值秋杪兮飛霜
迎節白石皓兮急晷乍逝涼月曠兮樂哉斯遊暢襟抱兮
輜輶僂轡揚旛旒兮垂綏宛虹駕鸞鳥兮愛而不見勞心
悄兮

遊赤松山賦

若有人兮山之側叱羣羊兮走亂石山中道土指而笑市
上兒童舊相識林端獨鶴之巢天半雙鳧之鳥醒塵夢于
清秋訪靈真之遺蹟迺尋遠壑爰陟岑岳十步五步千嵐
萬嵐峯巒兮窈窕泉眼兮空嵌花霏洞門之屋雲張石上
之颿金華之秀林壑並美赤松歸立青霞蔚起積翠一千
丈環城二十里迤邐兩岡之坡約束雙條之水彙衆妙于
一覽窮萬象于尺咫杖策而上緣梯而升牽蘿兮翦蔓捫
葛兮扶藤筧卧逕而路滑薜沒泥而溜凝巖切細若束帶
石骨峭欲生稜挂雪練之一匹藏白雲之數層絕磴兮高
撐飛梁兮徑度登蘭皋以裴裒歷桃源而散步二仙之祠
縈抱於谷口三峽之橋敲斜乎沙路人行竹外之月衣溼
桐間之露爾乃披岫橫睇巖軒凌傑閣俯危垣芙蓉排闥
薜荔當門虎出林而驚鳥鬼嘯樹而欺猿霧黓黓兮晝不
掃星熒熒兮寒可捫行復行兮四山寂遠復遠兮天影碧
蓮分峯頂之青綺奪仙城之赤問溪上之牧童與山間之
樵客惟見長林豐草秦松漢栢無邊青杳之天何處神仙
之宅瓊瓏兮翠嶂潺湲兮澄湫曲房兮延夏網戶兮迎秋
瑤之圃兮山之幽驂白鸞兮駕青虬路漫漫其修遠羌延
佇而生愁

尖山觀潮賦

鹽官地屬杭郡東瀕大海龕赭兩山約束閩隔潮不得騁
與山爭勢洶而爲濤一日夜再至陵突尖山之麓沈沈隱
隱轉騰激洌而西流入于錢塘時屆秋仲士女雜沓揚帆
挂席周覽瀛壖衿服靚粧盈川蔽野昔之所謂諸侯遠方
交遊兄弟並往觀濤乎廣陵之曲江是也歲在丙子八月
旣望浙西觀察黔陽何茂軒先生率屬按部飭隄防視修
築以羊一豕一致祭于龍王大神禮成而返神保聿歸賓
具醉止從公于邁式燕且饗敷陳其事俾示來者

維勾吳之東境隸餘杭之舊疆環十洲而拱峙爲七郡之
障防樓臺紛其黠糾兮闔閭鬱其莽蒼瞰潮汐之奔迅兮

蘊懷閣別集卷第一

四

賦洪流之汪洋乍駕軼拔擢而揚汨兮旋温汾滌汔羌莫
從而縷詳始則陰霞陡舉遠霧譎變溟島没石林岑插箭
似神而非儻隱乍見盪日月之雙丸割洪濛之一綫俄而
排山躍馬驅雲結陳挾駟以走如牆而進千乘並騁萬弩
齊飛勢跣踔其上激氣駿鬣而下垂遂乃潭淪渤蕩瀟瀟
盪激沸潰灌漑濟潰淪澗汨白沙觸搏赤岬竦起鯨背翻青
鰲身射紫旣而煙開霧銷天光次寥覓雁共狎鼉鼉不驕
虹蜺倒景而綺合鯤鱗吐沫而珠跳輕颿則落日遙挂靈
旗則無風自飄猶復一氣吐飲衆壑呀呷精孕金蟻葩萼
石蚶浩浩茫茫忽不知其所止汨汨曠曠會莫窮其津涉
海之大也迴互萬里潮之來也繇歷萬古溯洪荒之莫定

緬明德於神禹繫東南之澤國厯千祀而利溥載稽海塘
之志備載濬築之功

皇朝奄有函夏允釐百工頒勸民之實政邁前代而立隆
列聖功德勤施久遠大賚國帑高築堤堰周巡瀛海親莅
翠輦哀鴻之集百堵皆作其魚之嘆兆人迺免

皇上顯謨承烈軫閱黎元命所司每歲給咨府庫俾塘工
計時以次繕完廢者必輯損者復全金隄之固萬世賴焉
黔陽何茂軒先生以浙西備兵之任爲海疆保障之司督
工役以勉作進賓僚而周咨時則天宇激曠秋暉明靄遠
渚安瀾長林延籟乍潢漾以灑滌旋滂淠以沆漑珠宮貝
闕神州隱躍之中玉柱虹梁仙窟清虛之外遠則陵阜截
岸鱗鱗纒屬近則城郭廣袤厯厯如繪於廓靈海長爲委
輸衍溢陂池資其滂沛吾師于是具灌獻迓靈祇爲
朝廷答神貺爲蒼生祝福釐陳筮薦酤調竿撫瑟鐘鼓旣
備箛羞具設文儒景從吐庶懽洽展詩發志授簡命客清
歌四座隨白雲而高飛碧霄千頃共澄瀾而一色大士辱
厠負笈之列敬申測蠡之辭樂滯疾之悉解誌壯遊於今
茲愧夫元虛之賦枚生之發俱無足以當之

檀園賦

客有懷練祁之勝者百數十載白雲誰侶青山誰買化鶴
之石蔓萎乎荒煙飛僊之槎寂寥乎滄海當其庀近三隱
閣起六浮窈窕紺寒之室清虛墊巾之樓聊因樹以爲屋
或就岍而牽舟不衫不履而皆逸客亦莊亦老無非勝流
主人絕交宦而晦迹視榮利如脫屣王霸之茆屋蓬戶以
病歸隱周黨之短布單衣連徵不起此間可以寤宿可以
寤歌且復五日畫山十日畫水蓬蒿仲蔚之家松菊淵明
之里終吾生以徜徉極幽居之樂矣斯園也周迴廊廡環
繞漣漪螺粘浩髮魚穿荇絲蜘蛛網戶而煙細蟾蜍窺簾
而影遲方春乍晴雜花鬪媚千聲嘯鳥不絕數尺游絲欲
墜南畝之筐筥紛其饒黍東菑之臺笠聚若鱗次加以層
軒博敞夏室清闕櫻實朱肥荷衣紅醉拳鷺不飛病鶴獨
睡比王官之谷象其宵深如武陵之源別有天地又何必
刻藻裁茵雕金飾翠侈博陸侯之園林開竟陵王之邸第
涼颺颯爽秋意蕭疎稭稻之香滿樊雞豚之社比閭千頭
之橘官免其稅一頃之豆歲儲其租量十笏兮容鄙愛三
餘之箸書明月可掬梅花自鋤雪壓枝頭花疑着樹冰生
水腹澗不通渠乃消九九之寒圍鑪到此爲掃三三之徑
入室灑如泉石枕漱足移我情煙雲供養豈求人給乍曳
菅輓偶攜藤笈或染香庵主扣舷而來或松圓老人迎門
而揖老樹成鱗小舟如芥稚子烹葵山妻剪薤杖有貯錢

門無索債非有意于軒車本無嫌乎湫隘丹林千樹停車
小杜之詩綠水一灣着色大癡之畫城郭如故風景不殊
小橋斜曲深巷縈紆過其地者惟見釣月漁叟擔煙樵夫
秋霜千樹春水一湖魚鳥仍識田園已蕪夫誰遡乎曾篋
之所布置而長蘅之所宴娛

在昔韜軒采風楚詩未錄嗣後六義浸替三閭踵興蘊天
人之瓌才履殞宙之奇變香蘭九畹與衆芳同蕪青山六
里有可憐之色攄其忠盡寫其憂愁湘南遷客之吟榛西
美人之詠時代雖殊其情旨一也羸替鐺興恢廓道訓爰
及孝武雅愛楚騷傳其學者肇始淮南後則劉子政爲之
編集王叔師定其章句隋經籍志楚辭于集部中自爲一
門有郭璞注十卷皇甫遵訓參解七卷又徐邈孟奧宋處
士諸葛氏釋道騫俱撰楚辭音劉杳又有離騷草木疏諸
書或隋代散亡或唐時缺軼王逸古本巋然獨存治及趙
宋則有洪興祖之補注朱考亭之集注以暨吳仁傑楊萬

蘊懷閣別集卷第二

一

里錢杲之屠本峻諸家佃古漁今網羅纂輯瓣香什襲津
逮良多當日山鬼篇成鵲啼猿嘯泊沈淵以後秭歸故宅
夜雨聞碓夏邱門蕪江潭猶昨霜天冷月恍聽清陰千載
忠魂懷沙誰弔一時絕調接軫爲難宋玉景差畧堪嗣響
至于賈生惜誓淮南招隱曼倩七諫王褒九懷濫觴靈均
僅沾餘瀝郢歌一曲試沿流而討源湘紉五十或移宮而
換羽此優彼絀畛域分矣文約辭微行廉志潔龍門論騷
夔乎尚已賈生揚子重其才悲其遇昧其制行誚其輕生
而班固露才揚己之論之推家訓引而襲之以爲顯暴君
過懟忿霧修曾不思河麋微遁飄風攬心山蕪隰棧菅華
苑柳忠愛之意奚以寄焉故劉勰謂耿介祇敬之論體備

典謨虬龍雲蜺之詞義工比興特豐隆求女鳩鳥媒妁擬
斯之類稍近詭誣知幾謂宣僖敷政載在周詩懷襄信讒
著于楚賦頌固非諂刺豈同謗猗與良直尚友董狐持論
乃爲至當云夫騷以繼詩依經立義彼蒙莊放曠著述猶
以經名豈屈子幽愁忠愛違乎經旨矧雄鳩佻巧厘鷺弁
之閔憂蘭芷蕪穢寄茗華之哀怨郢都一望君門九重作
歌告哀我言雜服彼太元之擬易元經之擬春秋曾何足
以語此哉余素者楚騷近獲宋槧讐校之餘重爲鈔輯音
訓詮解旁采諸家竊附己意至疑義所在未敢凡斷俟博
雅者訂正焉

泉幣儲珍序

緬惟義繩握鏡石函肇扃琅書曝棘範銅寶袂始傳金冶
炎農神字之模姚媯乘馬之策上幣中幣楸遷乎化居歷
山莊山宏濟乎歲祲蒼籙八百九府利用赤符四七五銖
復興輕重則與物權衡沿革則隨時通變嗣後一姓改玉
必備貨金一州負嶠或侈鼓鑄凡夫一刀四出兩柱重輪
折二折五當千當百之屬諸史彙其源流百家資其彙校
雖襤屨緜亘而義炳圖牒是宜傾竹素以具析泐貞珉而
並壽已然而滄海生桑高陵變谷珊鉤鮫淚泣金氣之銷
沈漆鐙蚌油和石髓而燎炙異豐城之寶劍精光不飛同
茂陵之金盃土花半蝕加以段桃鳧桌磨鏽毀鑠蠻徽穴
島輦航山海其勵有存者又從而闕之遂乃奉蛻蝦爲靈
物莫罄和嶠之藏伴釵釧爲辱金不入明誠之目磨丹握
槩則筆談較易別真挾贗則掌錄爲難此卽梁顧烜之書
尚存唐封演之徒競出而徒倚撫箋訓釘餽蠹蟬唾分金
李之餘牙拾張董之慧墜簡恣搜玉卮無當欲使訂鄱陽
之譌恐復蹈子虛之病也余藏古泉歲更數檢北遊燕趙
道經齊魯昭王市駿之貲威公求鹿之貨每睹異品輒購
兼金不吝典裘任啣索米或一緡之選羽耀吉光或百朋
之錫珍逾郢璞日計月量積鎔累銖覈諸蘭臺彤珥疑剖
豪芒證以茗玉翠珉合同符節輯成譜錄顏曰儲珍綜卷
帙所編列悉篋衍所備蓄物經手翫典異耳食此外未經

貯收是冊概從闕畧愧少珊瑚之網掛漏滋多學求象罔之珠冥搜是殫若其每卷序次之體恭遵

欽定錢錄之例編年紀事世代相嬗考義研典正閏自別餘若壓勝撒帳吉語將馬錢鏡諸品流播緇緇繩足資閱覽供養几席亦饒古澤附綴簡末聊識緒餘惟是黃支烏弋拔汗閭婆流沙大漠之區十洲三島之境並有鑄冶必求徵信古囊偶儲奇品間獲匪忍割愛將俟續編博雅君子惠而好我網羅散佚補其不逮是所望焉

溪山卧遊錄序

余性者泉石情耽翰素六法之學廿載于茲筆鈍若椎心
頑肖鐵意恠偶託鏤弗舍寘沿討所悉畧可贅陳粵自兩
晉暨乎六朝三祖之稱四聖之目曷乎尚己摩詰畫師將
軍小李南北別其派唐宋衍其支逮自元明迄於

聖代名家林立鴻製贍列後進之士追維典型通厥流貫
師承授受蓋可得而稽焉夫曾臺雲構祗一壘之所基滄
溟水深乃百川之統漚彼陟岡者中道而立問津者自厓
而返卽此藝成而下曷以技進乎神末學庸約詣力單弱
敝屣而弄荆關望洋而詫范李習率易爲高雅矜詭放爲
離奇以空諸所有爲士人家風以自我作古爲才人能事

不知精能之至乃顯神通絢爛之極方歸平澹昔者華亭
擊節於吳興石師服膺於墨井營邱之千巖積雪忠恕之
一角透嵐不以疎密分高下也石翁之氣格渾成六如之
風流蘊藉不以濃澹判優劣也今欲不遵程穰別擅心裁
盡棄筌蹠獨矜妙悟不學無術貽舛滋多更有剽竊墨薏
鉤摹粉本鏤碧雕紅模山範水岡巒拱揖之法徑路遠近
之形竹樹偃仰之容屋宇向背之勢雀燕銖兩不讐乎定
式鳶魚飛躍頭失其靈機欲步北苑之後塵直比南宮於
優孟虬鱗之松霧歷居然黃鶴山樵鼠足之點蕭穆自詡
梅花庵主此又成規是襲真趣無存詩書之氣積之也不
深磊落之懷發之也不暢方斯之技奚足取焉下析流弊

上究指歸資深逢原博綜約守功候所臻匪伊朝夕一隅
勘覲寸管是窺聊爾箸錄有慙證辯狹見疎漏諒不足譏
續有見聞重爲綴輯云爾

蘊懷閣別集卷第一

六

唐墅張氏宗譜序

在晉系傳唐杜晉卿世守其職官史典伯鸞籍父誠深於忘祖是以高陽分胄楚大夫述皇覽之初縉雲相黃漢太尉辨炎神之統子長孟堅徵援掌故敘列國世家表王子侯者此宗牒之權輿譜學所基始也張氏之先彤魚發祥弧星主祀佐宣輔周修官仕晉侯老趯酪名聞春秋五世相韓七葉翊漢賀婁神道之碑紀其舊德歐陽世系之表代有達人丕著正始式觀先燬韓國之派五世傳杜陵八世居吳郡十三世徙彭城十七世復歸吳中時則婁侯子布佐孫氏有功食采分茅烏奔蕃衍由晉及唐歷年五百有餘傳世三十有七至趙宋建隆之代實來虞山洎勝國

嘉靖之初乃遷唐墅迄今三百餘載遠溯韓國六十餘世矣其宗譜之作始于道瓊處士浴于陳可太學其間克儀栢臺晚庵令孚諸家遞有增修道瓊名瑤陳可名國輔俱以文章世其家國輔纂成後又數傳族裔邦鎮重爲綴輯丐余弁言夫古人保姓以受氏敬宗故收族門內之祭曰繫宗廟之主曰禘合食謂之祔合祭謂之禘繇以報本反始展親睦族昭穆之位定隆殺之義分別子爲祖繼別爲宗繼禰者爲小宗而族屬以序上治祖禰下治子孫旁治昆弟而人道迺立慨自宗法不修世次失攷輯譜者景響門閥博會纓冕獻不足徵文溢其實繁而鮮當僭且益誣若夫謹慎之士勿聽無稽凡所褒揚必覈徽典而墜簡已

散家乘闕如史官軼而勿采故老言之莫詳遂令潛德長
韜含華罔曜其爲悼快又何如也今張氏自畱侯以降不
疑典高襲爵通侯儷許史之榮佯袁楊之望唐宋以來千
有餘載雄圖贊務膺文武簡畀者若而人高棲厲行立人
倫師表者若而人或鳴玉南宮或攬金北陸或存神養齋
如臺孝威或勤處隱約學矯仲彥罔不據事以書考行以
實浮夸之誚闕畧之嫌質之斯譜庶免此弊遂可資史傳
之考證近亦備邑志之搜采不僅以一家之書一書之傳
爲青陽氏裔誌幸也余故樂從而序之邦鎮行誼諄愨有
古君子風入都赴京兆試文譽振起厥宗之興其未有艾
乎

李曉潭竹湖山館古泉拓本序

夫以鑿精馮翊峴山瑩珠彈之輝博擅歐陽潁州出翠巒之秘粹所好者不脛善走類爲招者無翼能飛矧復周幣九府漢官三品巾箱儲黃雀之銜甕鬻貫黑龍之索絢赤仄於水衡曜紺文於銅扇續道元而作論嗤夷甫之不言澤古醜心耽學頤志將以研翫新獲攷證曩聞奚必入南康之郡市庀爭誇遊玉壘之川棧臺高築乎吳門李子曉潭華胄揚芬藝圃振藻綜彥遠之閎識集德甫之秘錄博撝吉金精覈古貝同和嶠之癖則古衷自摠學劉寵之選乃多文爲富叢其纂述炳焉爛焉蓋自吳棘制湮義文字蝕了旁斜畫山下安中金李張董踵謬沿訛么幼差弟亂

真襍贗封演已軼全書洪遵適滋疑義遂令尚金當垆詢梁幣而闕如火布橫千混黃刀而莫辨甚至漢興昧李壽之編年大平疑馮洪之私鑄則是弄兇雞之野遑問園泉投飲馬之橋概稱榆莢凡諸滲漏急藉訂釐君乃金心中銀手同貫平陽安陽庀陽別其源流馬排人排水排審其功用權衡銖兩鉤勒分隸遠肇邃皇近迄勝代由正統降及閏位則綱目之筆瞭若指掌也從中土旁及外域則輿地之圖燦如列宿也擬諸捫星辨尺驗鐸編鐘摩薛搜碑剝落讀碣閱雅之目殆庶幾焉或謂藏鏹有神點金無術給尉遲紙帖必求金甲真人訪文本山亭難遇上清童子而僅軸題紫標形模白撰匪河間之工數類綦母之徒

行得無敵文妬紅驚眼蝕翠蚨點血而不化蜨生翹而善
飛徒饜饜古之心奚當療貧之術然而積竿緝於金屋則
錦匣之裝不若花徑之甃也供翫索於緇繩則寶庫之充
不敵湘囊之富也羅列千禩照燭九垓坡君圖譜與僕同
嗜摹拓則尤擅精審詮解則互有發明梨棗待鑄藝林快
觀若逢武子勿以阿堵爲憎嫌倘遇鄱陽將撫陳編而愧
慙

練川七生圖序

練祁塘聯屬婁曲盤盪瀛壖澄渟百里水木明瑟是惟英
淑所儲稽述作之窟藪也傑彥偉儒接踵累代近自吾師
錢竹汀先生以兩漢儒林爲一鄉耆宿海內之士聽采風
聲仰德不暇言漢學者必宗練川邑中後進克廣術業宏
材旣劭俊譽益隆若七生者皆其選也懿夫春華薊苳無
百尋之茂蔭則其垂條也不繁秋實馨烈匪千歲之靈根
則其吐穎也易萎是以羣峯窈窕喬嶽之秀所分列壑奔
騰滄溟之瀾不竭層冰之凜則積水之始基也專門之業
則名家之軌範也司馬談遷班氏彪固研史之徽著矣伏
推理湛桓號榮郁析經之典彰矣淑爽西豪里名高陽瓊
實雕龍世禪亭伯蓺苑紹乃弓冶書林廓其堂構矣况復
馬扶風之席盧鄭皆通儒蕭穎士之門尹桺僉才彥豈第
擅出藍之異才羣夸李謚問太元之奇字共羨侯芭故其
沐浴庭誥稟守師承駿整蘭筋抗招搖之星旆鴻揮勁翮
耀神景於雲蜺敦履璞沈不飾乎僞行吐飲翰濤不侈夫
浮華言乎其學則疏證典憲膏腴德義匪直逞辯說撫訓
故以扇夫談資輟厥奧旨也言乎其文則激揚雅訓彰宣
事實匪直襲形模工比類以局於陳迹放於詭辭也人如
建安樹應劉之盟壇友同竹林匪阮嵇之曠放藜牀相對
茶竈爲鄰比李膺之遇林宗如周黨之過閔子其或雪泥
少淹河梁暫別苔痕春淺蘋花秋早風雨一心關山千里

陸士衡有赴洛之吟謝子暉有新亭之什莫不醇聽互勗
古膽並照惟期白水共此盟心雖隔青山無殊會面已異
日連茹甲乙淑問休闡翩其遐舉爲時之冠則攀龍鱗附
鳳翼奮袂以升及爾如貫固七生之志也然亦有命焉倘
其少翁已貴而子陽未顯巨卿牧伯而仲山隱淪則昔年
雒社車笠重逢古劍延津雲龍復合其達也奚加其窮也
奚損其在上奚喜其在下奚憂箸述之事相輝於今古雲
霞之契不判乎升沈此又存乎七生之自命而不佞之所
私自箴勗者也余之蕪陋近益積朽鍛羽之禽難漸儀於
逵路埋沙之鐵猶銜想於青萍綴此序言弁諸圖幀損辱
嘉命不任慙欵顧已循涯實深塵忝爾七生者葛鐵生其
仁徐桓生述虔黃雲生穆生陳恬生琢毛生甫嶽生錢竹
生師康莊桐生爾保余與七生欽遲積愆鐵生家居過從
頗密桓生都下尤友善云

黃香鐵江天永慕圖序

聞之行役慎旃猶來無棄人生惟別黯然消魂何況枕櫛
嶺岫終身銜恤之天楊柳秦淮千古傷心之地吾友香鐵
黃子當蘭成射策之年懷終軍棄繻之志孤飄瘴海四馬
巖關遊子辭家高堂叙別已躡蘇秦之屨重牽溫嶠之裾
難忍愛而割慈爲灑泣而送遠繫驂建業鼓枻秣陵歲在
屠維月逢重九佳節思親之候愛子分手之辰青衫躑躅
而北行白髮飄蕭而南返遲尺素則愁共迴腸訂歸艤則
言猶在耳豈料芙蓉秋豔纔成半面之粧榆柳春寒已改
一年之燧麻衣雨濕鐵羽雲殞戴星而奔呼天莫掬築廬
誓墓負土成塋問江上之青山慘天涯之落日模糊淚墨

嗚咽寒潮白楊蕭蕭青楓瑟瑟笛步則鷺影三分板橋則
鴉羣千點鳳皇臺上草何事而恒枯烏衣巷口花何爲而
欲泣覽斯圖也有不泣然以悲淒然欲絕者伊何人哉然
吾爲黃子痛而更爲黃子慰者使其息偃家衙局促園屢
逐麋鹿而居謝舵轅之迹藉一邱一壑以娛心假中隱小
隱以傲物徒高養志之名終昧顯親之實是謂守雌殊慚
貽翼又或飛蓬歷亂浮梗漂流負米不歸印泥少迹繞朝
有策而莫贈聲子無荆而可班是謂浪遊徒垂色養今黃
子裹白袍而上書燒紅燭而研典囊錐已脫其穎匣劍更
淬其鋒而又贈僑獻札餞趙亨韓華譽動於公卿榮聲起
於門閥呼爲名父之子推爲後起之秀將使鶯花十載重

尋笠屐之遊金粉六朝更擅文章之麗爲湖投書渚畔塵
扇渡頭鯉可言詩驥能馳譽雖傷舊夢之非不灑新亭之
淚魂而有知含睇宜笑固其所也獨是蘭笙之什待補於
詩人風木之悲不忘乎孝子迢迢遠道湛湛長江恤乎湫
乎夜半烏啼之曲松耶栢耶雲間鶴唳之聲惟鳳毛之不
墜君其長誦乎清芬嘆馬鬣之已荒我亦同深夫哀感

雪夜集大庾相國海澱園居序

瓊樓百尺玉皇案吏之居珠樹千林瑤圃棲真之宅平沙積岼春禽不飛層冰在川凍鱗潛伏雲霧霧兮陰濃花霏霏兮寒重

六飛之莅稅于農郊三白之占歲其大有時則大庾相國戴公行隨

輦蹕香近鑪煙恭和

宸章渥承

褒語迺於退直之暇徧集賓僚晝日接三筵開燕九賡周雅南山之篇奏楚客郢中之曲傾湘吳醇酎之樽羅山膚薄者之饌俄而急晷焱逝華鐙高張崇臺列壁雕甍連璐

蘊懷閣別集卷第二

五

帷幔流暉廊廡凝曜牕待月以承橫簾垂波而曳練庭鷗舞翻梁燕啄素檻落銀河屏橫玉柱花房清闕頻催魚鑰之聲網戶高寒恍聽霓裳之曲朱顏旣醅樂飲胥暢投分披懷贈詩見志維公燮和台曜宏長風流高人何點成其翹秀之才徵士劉虬勗以丹青之價羣彥慕響各盡所用而某更有進焉者發來思之詠宜憫勞人歌集霰之章無荒好樂庶幾協氣所召時序不僾盈尺之祥天顏有喜躋堂稱觥燕笑譽處奚僅侈相如之翰藻誇鄒枚之妍秘已也公曰善乃爲文以序之

翁覃溪學士蘇齋賞菊詩序

井梧翠凋砌薜綠暗小雨忽至疎花轉嬌蘇齋主人引壺
觴以侑酒集賓僚而賦詩俊彥從勝儔雲集蕭該何妥
同濡軌於金臺王褒庾信並騁妍於詞社筇屨桐帽栗杖
蘿筇倚檻而吟傷籬而坐遙山一角青入薜蘿曲池兩岍
煙生荻葦團欒十笏似丈人農隱之居圍抱千花極高士
幽棲之勝三升酒盡四座興酣翰墨助其妍華情灑浮乎
澗渙儲其衆妙彙爲一編傳來玳瑁之牋盃以薔薇之露
共進延齡之祝請爲學士奉觴願貞晚節之香無使寒花
笑我

粵東七子詩序

神山四百三十峯形軒玉墀飄忽隱見傳自太古之世浮
來南海雲霧變幻風雨離合靈淑之氣縣亘二千餘里其
中淵彥窟藪鱗翼蒼蔚蓋自曲江名相肇始正聲至南園
十先生暨海雪獨漉溱湟六瑩而臻極盛近則魚山太史
與張黃黎呂先後接軫今且風氣日上吐納菁華陵轍前
古於是海內才彥長安士大夫論著作者交推嶺南憶自
金臺旅邸縞紵贈會惠我前綏勗以光彩尊空晨座燈燼
夜几朱絃一曲不濫盈庭之筮長劍十年思爲知己之贈
觴詠之樂聞者豔之無何握手一別填膺百憂纏綫今昔
彌益喟嘆迹疏意通期賒道密每稔舊侶如挹冲抱爰檢
篋衍錄序所作列爲七子編成六卷驪珠徑寸豹管一斑
雖瑤英之璀璨金華之晃曜珍翫什襲靡得而踰焉七子
者陽春譚農部敬昭吳川林孝廉聯桂順德吳大令梯黃
侍御玉衡番禺張進士維屏香山黃明經培芳鎮平黃孝
廉釗序之者鎮洋盛大士也

陸萊臧詩集序

橫雲虹跨秋嵐之霞氣千門圓泖練澄春浦之瀾光一碧樓聳拄頰亭開醉眠凡水木之明瑟林壑之清淑詩人得之以攄寫胸臆激盪性靈是故文章之府地脈顯其珍闕江山之勝才彥萃爲淵藪青浦陸子萊臧生水雲之鄉挺神仙之骨當夫奈山山霽梧溪溪暖桂閣閣高雪軒軒敞月娥誇其曼姝山靈助其嘯呼猿驚雁落擊香掣解之思玉笑蘭啼鏤碧瑀朱之字萊臧以庚午鄉薦再赴公車甲戌之春與余定交都下見其英姿方蔚逸趣橫溢同人習制舉工帖括者勤刺股之揣摩問畫眉之深淺談風尚則刺刺不少休倖聲華輒欣欣其自得更有湛樂酒食徵逐

蘊懷閣別集卷第二

十六

游戲懶抱兔園之冊樂觀魚里之優又或晨趨金張夕謁許史懷中之刺向高門而濫投馬足之塵望朱輪而下拜風斯下矣陋如之何君獨泊乎寡營翛然絕遠常倚日暮之竹不變踰淮之橘故其爲詩也清飈冷然惟列子之能御冰雪在抱匪元規之能汙迺者易吳趨之調爲燕筑之歌以南士與乎會盟使北里辨夫寒暑於是雲間士衡之作有并州越石之氣滹沱河畔關雲擁而峯高勅勒聲中筳吹起而霜冷時則京營貔虎甫唱凱旋河朔鯨鯢尚虞鉅險讀杜陵諸將之篇擬吏部元和之頌往往酒酣拔劍斫地悲歌夜半聞雞披衣起舞壯士爲之動容書生因而投筆然而人非燕相市骨者空慕黃金賦擅梁園騁妍者

反嗤白戰未免哀蟬落葉泉咽玉河羸驂控鞭塵飛珠市
春明之夢初醒故園之花無恙清風一席飛霞半帆盪東
吳之畫橈結西泠之吟侶一昔之酒對盞並其嘯歌一篇
之出雙情緯其繇暖墜歡同拾近製出觀百讀百思載服
載翫愧懵識之照隅聊綴蕪以傾悵獨秀擅江東之望旣
傾倒乎謝莊相知定異日之文敢以屬諸敬禮覽斯聲言
共締岑契當更續周雅嚶鳴之章願無忘衛風木瓜之義
也

淮上唱酬詩序

余息影射陽羈迹冷宦樗散瓠落絕意進取惟吟咏之事
鏗而弗舍幸此間人士不見擯棄相得甚歡余性懶散不
好詣人息柴桑之廬絕少車馬避元規之塵恥爲襜褕獨
於詩酒之會每一招攜欣然命駕軒棲堞影檐禽下而呼
羣嵐涌鉢池山花紛其笑客或一盤苜蓿半壺濁酒開徑
揖客惠然肯來流連竹石之間舞詠雲霞之契閒鱗戲沼
愜靜契於川梁候雁銜雲入秋心於平楚時則有若朱君
紆邱君彬郝君其燮李君續香友香樂數晨夕不辨賓主
適鐵嶺達君麟通州成君儻宿遷陸君從星同客淮上鄭
僑吳札迭主敦盤分牋擊鉢各出秀句一篇甫出合座傳
觀一字之疑互相商榷兒子徵璵隨侍至淮諸君以爲可
與言詩許陪末座余亦顧而樂之一載以來言必諧聲唱
乃衆和因錄所作付諸梓人以志鴻爪嗟乎伐木之契吾
人所同搏沙之感他日請念留此一編以供二復相與藉
文章爲賞心不僅作雲煙之過眼已也

棗花樓詩鈔序

夫以冷夔妙律匪濫奏於筮簧夷且冶容不逞妍乎金粉
叩徵叩角抗墜協於自然乍陰乍陽神光儻其萬變是皆
冥風泉以振響曳雲霞而作佩迺曠如軼俗翩其絕羣
文章之道如操音然飛聲激塵繁紉促柱非其至也如選
色然姸人流眄華袿麗藻非其至也在心爲志發言爲詩
亮有真宰詎容僞襲程君與九性秉慧邁蕤嬋羣雅宏成
與石景純傳豪荆峯之玉連城渙水之瀾千尺然而啟中
黃之少宮則采菱陽阿聞而掩縵挹仙姿於姑射則靡顏
膩理見而忤容其視繁會迭唱左竽右瑟十眉競鬪盛采
裊服者貞淫雅鄭蓋判然矣淮陰郡城水陸之會冠蓋相

望與九閉門卻軌囊書兀坐寒檠倚雪暑艸搜螢琴歌則
夜分不輟文酒則客至不速謏陋如僕迺貞交契感分識
歸推心敘款余語與九古人千載孰踐厥軌勉圖令名是
在吾子與九語余名山之業勿謀胡成過情之譽讓而勿
爭同心之言相視而笑出所箸詩無慚作者特其菁英蒼
粹富有卷帙所刪存者什僅二三耳琤美是握以物罕而
倍珍澄汰必嚴曰吾斯之未信深藏若虛集益愈廣緬彼
時流末由等量棗花樓者與九讀書吟眺之地勝情所寄
詩境肖之鉏花待雨聽鳥知春煙重寒輕簾疏香密雲屏
一角聽瑤瑟之未停月痕半規恍明眸之善睇洞庭張樂
激揚金石之音洛濱弄珠窈窕天人之致嗟余情味微識

端倪譬猶過北里以調箏對南威而窺鏡而聲由情感倚
歌輒和子非我面相告以心十誦莫罄數言是綴願作雲
龍之逐竊有幸於今茲重尋水鷗之盟期無負於他日爾

蘊懷閣別集卷第二

二五

徐秋士詩集序

吾婁風雅胚胎宋元甄育明代雄州肇建鴻才喬興逮自
聖朝沐浴昌化烏弈繇遠諸家譔箸麟然炳然方今英俊
接軌喆彥步武殊狀同體日新月異徐秋士孝廉以太僕
之裔累世其昌賢書之升一戰而霸矚辰倜儻壯志卓邁
安陸文彊少以名聞郡國安平子璋學成而遊京師小廬
峰館集臚列衆體奄擅羣美章莪之岡璀璨瑤碧夫餘之
珠錯落酸棗瑟瑟其古音敲彝賁爾柔色要皆竦身順
止繩墨不跌用能旌性制佩瑠枝縵華或崔巍切雲或陸
離長鉞或媵容修態或靡顏膩理時而歡愉恬逸爲繁英
爲茂榦爲春禽棲巖爲秋鳧浴沼左笙右管前宮後商樂

蘊懷閣別集卷第一

三

酒之夕長生未央時而悲壯激越爲宵笳爲曉角爲馬嘶
長城爲雕盤絕嶠沙雪壓岍河冰塞川鐵鳴金動奔猱墜
鷺若其吐飲沆漉瀟瀟瀝液則十洲閨苑水清雲淺碧霄
路近鈞琅聲遠又或山川湛鬱感弔今昔則金啼玉泣風
月騷屑折碑石人莽穢榛沒嶢嶢焉其凌厲也飄飄焉其
超舉也決乎滂乎而莫涉其津涘也君方齟齬余始摻祛
蹤跡之密於今數年長安人海迺才彥所輯羅聲華之結
鞵曼倩執戟見者嘲之仲華拜袞聞而繩之君則風軌軼
俗潔修秉素鴻羽可用鷗盟不寒末學之弊從風而靡者
甘忌辛好丹非素君則泊乎其衷淵乎其量師商叩商斷
竹續竹容納孔廣鑿藻彌審繇以植根固蒂抽英發條言

觀麗則永監淫費景企正始垂輝于春莊誠廉直之旨暢
狄成滌濫之音息百數十年鄉邦文獻踵而興者君之述
作其庶幾乎紬討斯集麤領涯畧忘其懵懵而綴以蕪語
讀君詩者當不以余言爲蚩鄙也

蘊懷閣別集卷第二

三

蘭素女史繡餘吟課序

蘭素女史姓趙氏名德珍湖州德清人余同歲生平湖楊
君蘋香之室所箸得月樓存藁凡十集其首集爲繡餘吟
課平湖縣志載其卷目縹囊積綺彤珥播芬雖瓊簫之奏
祇應碧玉爲緣而繡軸之香不與紫煙俱化原其德門詩
禮華胄影纓系溯鷗波里名松雪藐姑射之前身萼綠華
之再世玉榮之泉心其神骨都梁之馥溢於襟袞通仙心
於詩心以靜女作才女麝雲四壁月暎宜秋花霧一簾香
寒不落牋勻黛墨燭燦粧粲嫗解排籤婢嫵捧研蘇蕙倩
其扶輪左芬覽而斂衽矧復王孫南國烏奔清芬夫壻盈
川頽頽才望碧紗籠畔之蘭英駢枝駢穗朱鳥牕中之燕

蘊懷閣別集卷第二

五

子雙宿雙飛遂令如皋一笑則珩佩助其清娛房吹三終
則翹簧申其賡籟方期侶隨之樂百年與偕試問文字之
緣幾生修到何乃玫砧煙鎖薇帳風淒么絃紅玉續命無
絲小篆綠綈畱痕未蝕蘋香悼瑤光之韜彩集錦段以分
編惠示佩褱縷陳涯畧謂風前柳絮難綰吟魂而山上蘼
蕪每縈舊夢况乎證蘭因於花譜則殘箋之什襲同於金
鈴之護持編璫琲於縹繩則茗琬之銘馨勝於俸錢之營
奠於焉裝之寶軸麗以琅函奉倩端憂之夕鴛錦香銷安
仁永逝之篇鮫綃淚染梓人將命開雕藪林廣徵題詠聞
之慧難兼福則玉京路杳幻境非真情以生文則楚些詞
哀感人易入是以彩雲化去悟鏡花水月之皆空離恨傳

來歷地久天長而無盡也僕也苔岑舊契車笠新盟代孫
楚以寫愁愧徐陵之製序握研思焚買絲合繡叩僊詔於
華鬢天上傾耳疑聞珊珊之音招靈巫於玉塵峰頭綴詞
聊當傳芭之舞

蘊懷閣別集卷第二

三



